



Die Abverheite

Sujet: Aqua-Parade — ab mit Schade

E Zeedel z'verfasse
Isch bald nyt me gluschtigs;
's passiert zwor e Huffe,
Doch maischtens nyt luschtigs.

Me list yfrig d'Zyttig
Und wartet geduldig,
Hofft, glungeni Kaibe
Dien, was si uns schuldig,

Und lifere Sujet.
Ach, dass das so rar isch ...
Drum, was mir hie bruuche
Au im Ussland bald klar isch:

Zue uns will dr Sherman
Mit syne Najädli.
Dr Iwan sait «Njet» zerscht:
Zue scheen sinn die Wädli...

Kurz vor dr Première
Blatzt 's Bassin, 's ganz grosse.
Drotz Schuufle-n-und Sägmähl
In Käller lauft d'Soosse.

Dr Ober-Cloon sprachlos
Hoggt zmitts in dr Halle:
Statt Nixli Butzfraue,
Das will em nit gfalle.

Scheenhait-Keenigine,
Wo zaige-n-e Dänzli,
In's Wasser denn mache
Bald Aerschli, bald Ränzli,

Und schwimme-n-im Takt denn
Im Bassin rundumme,
Scheen farbig belychtet...
Isch alles das umme?

Doch gschwind in däm Chaos,
Drotz Lärm und Gezeter,
E Maschine stäppt 's Bassin;
Und kuum zwai Dag speeter

Isch äntlig Première.
Doch laider in d'Muschli

Fascht niemets streemt yne,
Nur so-n-e baar Glushti,

Ai Schynhailige z'vorderscht:
Zerscht stehnsch wäg däm Maiti
Uff sällem Plakätli:
Jetzt wettsch mit nach Haiti!

Und resigniert dänggsch denn
An Pfrau (Du saisch: Mutti),
In Kuchischurz, Fingge,
Und d'Hoor voll Bigutti...

's hett schynt's z'wenig Glushti,
d'Finanze stehn mys.
Bald macht dorum Pleite
's Aquatsch-Paradies.

's Schwimmbassin wird bschlagnahm't.
Im Droggedogg d'Nixe
Fehn scho a verquante
d'Bikini-Schwimmbixe.

Si gehn no Paris jetzt.
Wasserheesli bruucht's nimme:
's vermisst niemets d'Goschtym,
Wenn Misse dert schwimme.

Dr mis(s)ogyn Bebbi
Miss-gstimmt regglamiert:
Het's hie nit gnueg Miss-Ständ,
Dass me fremds importiert? —

Mir hänn scho d'Grawall-Gass,
und Miss-Erfolg d'Schugger;
Ime Staatsawalt, bsoffe,
Goht 's Auti zum Gugger;

E-n-andere schrybt Briefli,
Anonymi, ganz haimli.
E nai au, dä Miss-Griff!
Au är mues uff's Baimli...

Und e Drach, d'Margge-Mulle,
Drotz Gegenaktion,
Frisst unseri Aesche.
Dä gheerti zum Lohn

Als Brunnestogg-Plastik
Derthi, wo's am läärschte:
Uff dr ney Zschogge-Brunne
Als un-Populärschte. —

Was isch 's Quintessänzli?
Me kennti jo schrybe:
's haut's d'Wasser-Parade,
Doch d'Wasser-Kepf blybe.

d'Latärne-n-Usstellig am Zyschtig in dr Basler Halle wird gwis
kai Miss-Erfolg, will alli gehn, au Miss-trauischi und Nit-
schwimmer!